

bus conculcare magnificè gloriantur. Mihi sanè ab iis non procul abesse videntur: quandoquidem de Supernaturali istò Spiritus S. Testimoniò multa effecta, atque adjuncta proferunt, multaque alia garrunt: cùm interim ejus essentiam atque naturam nusquam proponant, nullibi explicent: & forsàn etiam ignorent. Quantàcunq̃ enim non tantùm sedulitate atque diligentia ipsorum libros percurrem atque evolverim; sed etiam attentione apud me ipsum quæsiverim, atque alios non tantum doctos, sed etiam indoctos quàm plurimos, ut apud se quoque inquirerent, seriò rogaverim; omnis tamen incassum cecidit labor, nec aliquid, quod animo satisfaceret meo reperire potui. Ingenuè sunt fassi mecum non pauci, se nihil præter claram atque distinctam illam perceptionem, ejusque conscientiam, atque in eâ acquiescentiam unquam apud se invenisse, aut aliud quid, cujus verum atque realem conceptum formare possent, apud alios, quantumvis de eò gloriarentur, invenire potuisse. Verùm alii quidem supernaturale quid, ac cæleste se sæpius sensisse, atque in se etiamnum reperire prædicârunt; quod tamen, quando ad exactum accuratumque examen revocabatur, nihil nisi affectum aliquem animi naturalem esse, aut imaginarii fruitionem boni, ex eâque in animò lætitiâ redolere, non tantùm ego: sed etiam aliquando ipsi liquidò deprehenderunt. Ex quibus omnibus satis superque patere arbitramur, quàm fluxò instabiliq̃ fundamentò innixa sit hæc sententia; etiamsi argumenta, quibus illam confirmare satagunt, non solverentur: Attamen ne aliquid, quò se defendere possent, intactum relinqueremus, & quod alicui scrupulum injicere posset, remove negligere, breviter illa sequenti capite explicabimus & quantarum sint virium examinabimus.

C A P. XV.

Expenduntur Rationes, quibus Spiritum S. sacrarum Literarum Interpretem esse, astruere contendunt Reformati.

SOli inter Theologos, quos mihi videre contigit, Whitakerus in Disputat. de Scripturâ S. Controvers. 1. quæst. 5. cap. 8. & ex eò Scarpius in Cursu suo Theologicò, loc. de Scripturâ, controvers. 8. tria proponunt argumenta, quibus probare conantur præter Scripturam, etiam Spiritui S. auctoritatem competere S. Literas interpretandi. Et quamvis, ut ferè omnes faciunt, illi jungant atque misceant jus omnes de fide controversias dijudicandi; nos tamen illò prætermisso ea solum, quæ præsentem quæstionem spectant, excerpemus atque expendemus.

Primum